



Sud Bosne i Hercegovine
Суд Босне и Херцеговине

Broj: S1 3 Iž 039159 20 Iž
Sarajevo, 14.12.2020. godine

Sud Bosne i Hercegovine, u drugostepenom vijeću sastavljenom od sudija Zvezdane Antonović, kao predsjednika vijeća, Dr Branka Moraita i Mirsade Džindo, kao članova vijeća, odlučujući o žalbi Milinković Željane, Koprivna, Oštra Luka, koja osporava Zaključak Centralne izborne komisije BiH o odbacivanju zahtjeva za ponovno brojanje glasačkih listića pristiglih putem pošte u osnovnoj izbornoj jedinici Oštra Luka, broj 05-1-07-5-1532/20 od 09.12.2020. godine, u nejavnoj sjednici, održanoj dana 14.12.2020. godine, donio je

R J E Š E N J E

Žalba se odbija.

O b r a z l o ž e n j e

Zaključkom Centralne izborne komisije Bosne i Hercegovine, broj i datum u uvodu, odbačen je zahtjev Željane Milinković, kandidatkinje za odbornika Saveza nezavisnih socijaldemokrata-SNSD-Molorad Dodik za Skupštinu opštine Oštra Luka za ponovno brojanje glasačkih listića pristiglih putem pošte kao podnesen od strane neovlaštenog lica.

Protiv ove odluke žalitelj SP je izjavio žalbu zbog povrede zakona i pravila izbornog procesa, nepotpuno i nepravilno utvrđenog činjeničnog stanja i pogrešne primjene materijalnog prava. Žalbom ukazuje da je njihov zahtjev od strane CIK BiH paušalno odbijen, jer je pored žaliteljice kao supotpisnik zahtjev potpisao i predsjednik OO SNSD Oštra Luka. Navodi da je prema njenoj procjeni za nju glasalo minimalno 10 članova njene porodice koji žive u inostranstvu, a ona je dobila samo jedan glas, te je oštećena gubitkom odnosno neosvajanjem mandata.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da **žalba nije osnovana**.

Centralna izborna komisija Bosne i Hercegovine, je u konkretnom slučaju, ispitala sve navode zbog podnesenog zahtjeva za ponovno brojanje, jer je isti ocijenjivala i po službenoj dužnosti. Na taj način je potpuno i pravilno utvrdila činjenično stanje prema kojem je za osnovnu izbornu jedinicu Oštra Luka (033) utvrđeno da ima ukupno 142 birača registrovana za glasanje putem pošte, prema Odluci CIK BiH broj: 05-1-07-2-1075-2/20 od 05.11.2020. godine. Prema izvještaju Glavnog centra za brojanje CIK BiH od 04.12.2020. godine broj neuručenih pošiljki birača registrovanih za glasanje putem pošte za osnovnu izbornu jedinicu Oštra Luka je 19. Nakon završenog procesa verifikacije glasačkih listića u Glavnom centru za brojanje, pravilnom primjenom odredaba Pravilnika o organizaciji rada i utvrđivanju rezultata glasanja („Službeni glasnik BiH“, broj 73/20) od ukupno 56 koverti svih 56 koveri je prebrojano i verifikovano. Argumentacija žlioca, da je za nju glasalo 10 članova njene porodice koji žive u inostranstvu, a ona je dobilka samo jedan glas, u kontekstu pravilne primjene propisa kojima se utvrđuju rezultati glasanja putem pošte nisu relevantni dokazi nego se mogu kvalifikovati kao subjektivno mišljenje političkog subjekta kojem nedostaje određeni broj glasova da bi ostvarili željeni izborni rezultat.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81 stav 1 Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
S U D I J A
Zvezdana Antonović